

Martirs, confessurs e lieus d'appariziun

Pelegrinadis a lieus sontgs en il Grischun ed utrò

■ **Pelegrinar vul dir bandunar per motivs religius il lieu da domicil per visitar in lieu sontg e gurbir là l'agid divin, per ordinari cun implorar Maria u ils sontgs. Il papa confermava lieus da pelegrinadi cun attribuir perduns, cun permetter messas e processions.** Il 1488 è attestà in pelegrinadi da ricla e penetienza a Roma u Nossadunnaun, cumandà da la dretgira a 12 umens da Vaz e mintgamai ad in da Curvalda e da Parpan per expiar lur assassinats. Lieus da pelegrinadi impurtants en la Rezia eran en il temp medieval S. Gliezi e S. Emerita a Cuira, S. Flurin a Ramosch, S. Gaudenzio a Casaccia, S. Placi e S. Sigisbert a Mustér. Quels quatter lieus sontgs han gi in gronda flurizium era en il temp medieval tardiv. Lieus da pelegrinadi a la periferia da la Rezia eran S. Proculus a Naturns (Vnuost), la claustra da S. Gagl e S. Frena a Zurzach/AG. Ils lieus da pelegrinadi pli lontans eran las fossas dals sontgs apostels a Roma (il pli vegl pelegrinadi dapi il temp medieval tempriv), la Sontga fossa a Jerusalem (documentada en il 12avel tschientaner), S. Giachen a Santiago de Compostela, attestà per il temp medieval tardiv, tranter auter era sin las picturas dal maister da Vuorz. L'expressiun rumantscha Via S. Giachen (che correspunda al tudestg Milchstrasse), las numerusas chapluttas deditgadas a s. Giachen (Tujetsch 1491, Zignau 1509, Breil 1514 e.a.) e l'existenza d'ina chanzun rumantscha da Compostela (probablmain già en il 16avel tschientaner) cumprova ina tscherta impurtanza da quel pelegrinadi, ma betg l'existenza d'ina via da pelegrinadi definida tras il Grischun. Sin via per Compostela visitavan blers era la claustra da Montserrat (Catalugna). A partir dal temp medieval tardiv èn s'aggiuntads ils pelegrinadis a la Hostia da sang a Müstair, a Nossadunnaun ed, a partir dal 1505, a Nossadunna (Madonna) da Tiraun. La reformaziun è stada fitg ostila als pelegrinadis ed ha mess ina fin a quels a Ramosch (ca. 1530) e Casaccia (1551). Adversaris profilads èn stads oravant tut Durich Chiampell en «Un cudesch da psalms» (1562) e Steffan Gabriel en «Ünna stadera da pasar quala seig la vera cardientscha» (1625). Ils auters lieus da pelegrinadi n'èn betg stads pertutgads ed han giudi grond esit en il rom da la religiusadad catolica dal temp baroc. Novs lieus sontgs d'impurtanza regionala temporara a partir da la fin dals 16avel tschientaner èn: S. Valentin a Pigniu, Nossadunna a Val e Falera, Nossadunna da la glisch a Trun, S. Antoni a Rumein e Mastriels, S. Vetger a Tumeagl. Ziteil ha pudì mantegnair sco suletta destinaziun sia muntada dapi l'appariziun da Nossadunna il 1580 fin il di dad oz. En il 17avel tschientaner èn attestadas pliras confraternitads da s.



La ruina da San Gaudenzio a Casaccia.

Giachen, per exempel a Tujetsch (1609) e Rueun (1642), e numerus èn en Surselva ils sanctuaris ed altars barocs erigids en sia onur. Cuntinuà han era pelegrinadis a Jerusalem, per exempel quel da l'avat Jakob Bundi il 1591–92. Roma attirava ed attira anc adina massas da pelegrins, oravant tut durant ils onns sontgs da giubileum, per exempel già il 1700 (tranter auter 21 pelegrins da Trun) ed il 1775 (tranter auter 12 da Tujetsch). Il spiert illuministic ha reduci e la Revoluziun franzosa impedi ils pelegrinadis, entant che quels han survegnì pli tard nova favur tras il spiert da la romantica. En il Grischun han ils pelegrinadis a Mustér (claustra) e Ziteil mantegnì fin il di dad oz ina tscherta muntada ed il pelegrinadi a Santiago de Compostela e viadis sin vias s. Giachen èn vegnids en moda en ils ultims onns.

Adolf Collenberg

Son Gliezi [Luzi/Luzius]

Confessur istoricamain attestà ch'ha vivì probablmain en il 5avel/6avel tschientaner. Gliezi è stà il patrùn da l'uvestgiedu da Cuira dapi il 10avel tschientaner. Sia midada a la confessiun cristiana ha provocà conflicts cun ils abitants da Maiavilla, Fläsch e Mils/FL che tgravan il cult pajaun da la vatga, attribuida als elements feminins da la glina, da l'agricultura e da la dunna. Quels han bittà el en in lajet sin il Pass da Son Gliezi. Persunas già convertidas al cristianissem han pudì salvar Gliezi e manar el en in cortegi triumfal en la citad da Cuira cristianisada. La «Vita» carolingica (fin dal 8avel tschientaner) ha mitisà Gliezi e fatg dad el il retg da la Britannia ed il missiunari da la Rezia. En il 11avel/12avel tschientaner è vegnida assegnada ad el la s. Emerita sco sora, en il 17avel tschientaner è vegnì agiuntà il motiv dal martiri. Lieus da pelegrinadi en veneraziun da Gliezi durant il temp medieval: Son Gliezi/Cuira (fossa), la foretta da Son Gliezi sur Cuira e la baselgia sin il Pass da Son Gliezi.

Ursus Brunold

Emerita

Tenor la legenda ina sora da s. Gliezi. Ella duai medemamain avair annunzià l'Evangeli en la Currezia dal Nord durant il 5avel/6avel tschientaner ed esser vegnida brischada sin il stgandler a Termin. Ses cult, anc betg enconuscent en la «Vita» da s. Gliezi dal 9avel tschientaner, è documentà tras funtaunas liturgicas dal 11avel/12avel tschientaner. Il 1208 cumpara Emerita sco *virgo et martyr*, il 1295 sco patrùna, ensemen cun s. Gliezi, a Cuira. Cun il cult da s. Gliezi è sa derasada la veneraziun dad Emerita en la diocesa da Cuira. Ils attributs dad Emerita èn la curuna ed il stgandler, la festa ha lieu ils 4 da december.

Veronika Feller-Vest

Florin

Sontg curretic, probablmain dal 7avel tschientaner, a Ramosch. Tenor la legenda è Florin naschì a la curt da Valfur a Matsch. En giuvs onns duai el esser i a Ramosch en l'Engiadina Bassa ed avair vivì là sco eremit e predigtant. La tradiziun preschenta Florin sco sacerdot cun in chalesch, perquai ch'el laschava baiver ils povers da quel buccal, en il qual l'aua sa transfurmava miraculusamain en vin. Il cult da Florin è fitg vegl: già l'onn 720 administrava il s. Otmar da Son Gagl a Cuira in sanctuari deditgà a Florin. L'onn 930 è menziunada per l'emprima giada la baselgia da S. Florin a Ramosch, pastorada da quel temp dal sacerdot Hartpert ch'è daventà pauc pli tard uvestg da Cuira. Hartpert ha dà novs impuls al cult da Florin. Dapi il 11avel tschientaner vegn Florin venerà ensemen cun Lucius sco patrùn diocesan. Il 11avel tschientaner è stà la perioda d'aur dals pelegrinadis a Ramosch. L'emprima versiun da la Vita da Florin (12avel tschientaner) represchenta, malgrà il stil agiografic, ina nizzaivla funtauna d'infurmaziun istorica. La fossa da Florin en la baselgia da Ramosch era messa en il grip e vegniva preschenta anc dal temp da Chiampell (1572). La festa da Florin è ils 17 da november. Il Grischun ed il Vnuost Superiur dumbran 18 patrocins da Florin.

Martin Bundi

Gaudentius

Sontg curretic ch'ha vivì probablmain en il quart tschientaner. Mort tras la spada. Tenor la «Vita» da Cuira dal 1520 ha il martir dal temp cristian tempriv convertì pajauns ed arians en la Bergiaglia. Episodas da la vita dal sontg Gaudentius da Novara enritgeschan sia legenda. Sco data da ses martiri valeva ils 7 da matg. Quel di cumenzava il pelegrinadi da Gaudentius che cuntanscheva sia culminaziun il di d'Anzainzas. Las reliquias da Gaudentius eran conservadas en la baselgia 800 m al nord da Casaccia, enconuscenta dapi l'onn 840 e suttamesa a la claustra da Faveras. A la baselgia, consecrada a Gaudentius, era annexà in ospizi; omadus edifizis èn oz en ruina.

Martin Bundi

San Gaudenzio

Anteriura baselgia da pelegrinadi (di da Nossadunna d'avust) sur Casaccia. En il 9avel tschientaner è attestada la baselgia sco possess da la claustra da Faveras ch'ha exequì la collatura fin enturn il 1450, alura è ella ida en possess da la Bergiaglia. Tenor la legenda è sepulidas qua las reliquias da San Gaudenzio, veneradas cun approvaziun dal papa dapi il 13avel tschientaner. La baselgia da San Gaudenzio sa chatta al pe dal Set e dal Güglia ch'èran las transversalas nord-sid las pli

impurtantas dal Grischun en il temp medieval. Dapi il temp medieval tempriv ha existì sper la baselgia in ospizi (menziunà pir il 1336) che renviescha a la funcziun da basa da San Gaudenzio. Il 1359 è la baselgia vegnida reconsecrada. Il 1518 è ella vegnida reconstruida en stil gotic ed il 1523 munida da la brev da perdun dal papa. Il 1551 han devastà ils reformads la baselgia ch'è vegnida bandunada en il 18avel tschientaner. Il 1925 è la ruina da la baselgia gotica vegnida restaurada.

Adolf Collenberg

Placi

† entschatta dal 8avel tschientaner, a Mustér. Pir in texts liturgics pli tardivs ed en la «Passio» dal 12avel resp. dal 13avel tschientaner vegn el menziunà sco protectur dal mung ambulat francon Sigisbert che vuleva fundar ina claustra en la cuntrada criva da la Desertina. Probablmain cun intenziun politica, forsà per sa defender cunter l'influenza francona, ha il preses Victor laschà assassinar Placi. Per l'expiazium duai Victor avair fatg a la claustra da Mustér donaziuns impurtantas. La veneraziun da Placi era derasada a Mustér ed en l'entira Rezia.

Carl Pfaff

Sigisbert

* vers la fin dal 7avel tschientaner, † l'entschatta dal 8avel tschientaner. Tenor il num era Sigisbert probablmain in Francon ch'era sa domicilià sco eremit da temprà irofranca en la cuntrada deserta dal stgalim superiur dal Rain Anterior, numnada Desertina(s), e che vegniva sustegnì dal Ret Placidus. L'ipotesa, tenor la quala el derivava dal circul da s. Columban n'è betg cumprovada. Per sia resistenza cunter las pretensiuns franconas en Rezia, è Placidus vegnì assassinà, entant che Sigisbert è vegnì schanegà, probablmain per raschuns politicas. Il «martir» ed il «confessur» han chattà lur fossa en la cripta da la baselgia da S. Martin a Mustér, lur di commemorativ cuminaivel è ils 11 da fanadur.

Carl Pfaff

Victor da Tumeagl [Vetger da Tumeagl]

Il sacerdot legendar Victor da Tumeagl dal 9avel tschientaner duai esser vegnì decapità d'in cugliunader e duai alura avair purtà ses chau sin ina collina sper Tumeagl, sin la quala è vegnida erigida ina chaplutta consecrada il 1449. La perdunanza è ils 8 da matg, il di dal martir milanais Victor Maurus, stgavazzà l'onn 303, uschia ch'i pudess sa tractar en il cas da la legenda da Victor d'ina reinterpretaziun locala da la legenda da Victor Maurus. Il di dal s. Victor è dentant ils 28 da matg. El è vegnì venerà dapi il 1496, cura che sias reliquias èn vegnidas transferidas da Tumeagl en la claustra da

Cazas. Il 1646 è vegnida redigida qua probablmain la Vita «In festo S. Victoris Tomilensis Presbyteri et Martyri». Perditgas iconograficas dal 16avel tschientaner tempriv sa chattan en la chaplutta da S. Victor a Tumeagl. En il cas dal martiri dechantà en la «Canzun de s. Vetger de Tumeagl» (stampada il 1731) sa tracta d'ina legenda secundara, en la quala Victor è vegnì decapità da dus famegls per incumbensa dal cont Jörg de Werdenberg.

Ruedi Graf

Ziteil

Sanctuari da Nossadunna situà a 2434 m en il territori da la vischnanca da Salouf. L'enconuscenta baselgia da Ziteil è il lieu da pelegrinadi il pli autsituà en Europa. La stad 1580 duai Nossadunna esser cumparida là a dus uffants pasturs. Emprima documentaziun da la baselgia 1679, consecraziun da la baselgia renovada 1710. Il bajetg transfurmà il 1846–49 è vegnì remplazzà il 1959 tras in edifiz nov. Il sanctuari vegn custodià dal plevon da Salouf (1637–44 e 1726–1949 paders chaputschins). Il 1848 han ins costruì ina chasa da pelegrins a Ziteil ch'è vegnida engrondida il 1914 ed il 1949. Ziteil è in motiv impurtant en la litteratura rumantscha (Alexander Lozza, Alfons a Flugli) sco era en la musica (Ernst Broechin) ed en l'art (Giovanni Segantini). Ziteil è vegnì frequentà il 1978 da 4387 pelegrins.

Nossadunnaun

Attestà dapi l'entschatta dal 14avel tschientaner sco lieu da pelegrinadi da renum europeic, tudestg Einsiedeln (Sviz). Dapi il 17avel tschientaner vegn venerada la Madonna naira. En il 15avel–17avel tschientaner èn documentads da tut las regiuns grischunas plirs pelegrinadis d'expiazium e da puniziun per omicidi a Nossadunnaun. L'eminenta impurtanza da Nossadunnaun per ils Rumantschs sa manifestescha era en il num local rumantsch. En in codex da Nossadunnaun dal 8avel u 9avel tschientaner cumpara la «versiun interlineara da Nossadunnaun», ina translaziun tranter las lingias da l'entschatta d'ina pregia en latin dal 11avel tschientaner tardiv, l'emprim document scrit en lingua rumantscha. Dapi il 1515 èn attestads adina puspè confessurs da lingua rumantscha. Fin a l'entschatta dal 20avel tschientaner era il pelegrinadi a Nossadunnaun in stentus viadi a pe sur auts culms e pass: da Flemsur il Segnas, da Pigniu sur il Veptga, da Breil sur il Lembra, da Tujetsch sur il Cuolm d'Ursera u il Pass da la Crusch respectivamain tras la Val Milar. L'abazia benedictina da Nossadunnaun posseda il famus «Codex da Nossadunnaun» da ca. l'onn 1200 ed ediziuns fitg raras, per exempel l'emprima ediziun da la «Ünna stadera da pasar quala seig la vera cardientscha» da Steffan Gabriel dal 1625. A Nossadunnaun èn vegnids stampads var 12 cudeschs rumantschs. La scola claustrala vegn frequentada dapi tschientaners da Rumantschs e l'abazia tgrava dapi tuts temps relaziuns multifaras cun las claustras grischunas. Numerusas èn las represchentaziuns da la Madonna da Nossadunnaun en baselgias e chapluttas reticas, tranter auter a Sumvitg, Breil e Roveredo.

Adolf Collenberg



Maletg da devoziun da Ziteil.

Lexicon Istoric Retic

Il LIR cumpiglia bundant 3100 artigels (geografics, tematics, artigels da famiglias e biografias) davart l'istorgia grischuna/retica e la Ruman-tschia. Editura: Fundaziun Lexicon Istoric Svizzer; versiun online: www.e-lir.ch; versiun stampada: www.casanova.ch u en mintga libreria.